

Ontmoeting 6

Die skeuring van die ryk: Wie se raad volg jy?

Die kinders leer van die skeuring van die ryk

Teks: 1 Konings 12: 1–19

Hulpmiddels:

- Viltbord met die karakters van die verhaal (Sandboks met karakters kan ook gebruik word)
- Koerante
- “Top deck” sjokolade / Liquorice All Sorts
- Papier, kryte, kleeflint
- Wol of rekkies
- Kaart van Israel op karton afgedruk



Welkom

Onregverdig geveg: Kies 12 kinders om ’n eenvoudige speletjie te speel soos koerantpapieroorlog. (*Gee vir elke groep ’n paar ou koerante. Hulle frommel dit in koerantpapierballe waarmee hulle mekaar kan gooi.*) Die speletjie het h vanglek: Jy kies eers h kaptein vir elke span. Hulle begin om uit die oorblywende 10 kinders hulle spanne te kies. Sodra elkeen een gekies het, stuur jy die oorblywende 8 almal na een span. Daar is nou 2 in die een span en 10 in die ander span. Laat hulle dié onregverdige speletjie vir ’n tydjie speel. Sê vir hulle hulle sal later in die Bybelstorie agterkom waarom hulle so opgedeel was. (*Onthou, die speletjie eindig waar jy die reëls omdraai en kyk wie se kant die meeste papier in ’n mandjie het. So is jou plek weer skoon.*)



Wyding

Stilwoord-ritueel uit Psalm 23: Laat die kinders kruisbeen sit en hulle oë toemaak. Herhaal 3 keer. “Die Here is by ons.” Sê nou hardop: “Omdat die Here my Herder is, is ek nie bang nie. Hy lei my deur die donker tye en Hy versorg my.”



Woord

Doen die volgende aktiwiteite.

- Trek ’n stuk bas van ’n tak af.
- Maak die wit sjokolade los van die bruin sjokolade van ’n “Top Deck”. (Gebruik ’n mes.)
- Haal ’n laag van ’n “Liquorice All Sorts”-blokkie af.

Wat het met hierdie 3 goed gebeur? Iets is van iets losgemaak en die moeilikheid is dat jy dit nie weer kan saamvoeg nie! So wat leer ons hieruit? Dis baie makliker om iets los te maak as wat dit is om iets saam te voeg.

Agtergrond vir aanbieder: (sien video op KIX webtuiste)

1 Konings 11:26 tot 12:19: (Vertel die verhaal met behulp van 'n viltbord of sandboks.)

Jerobeam het eers vir koning Salomo gewerk. Hy het teen die koning in opstand gekom. Die probleme het begin toe Salomo bouwerk in die Dawidstad gedoen het. Jerobeam was 'n sterk man en Salomo het hom raakgesien. Hy het Jerobeam aangestel as toesighouer oor die bouwerk wat die mense uit die Josefstam moes doen. Juis in dié tyd was Jerobeam eendag op pad uit Jerusalem. Die profeet Agija het hom langs die pad gekry. Hy het 'n splinternuwe mantel aangehad. Dit was net hulle twee in die veld. Skielik het Agija sy nuwe mantel gevat en in 12 stukke geskeur. Hy het vir Jerobeam gesê hy moet 10 stukke vat, want die Here gaan die koninkryk van Salomo afbreek. Salomo het opgehou om die Here alleen te dien en hy het begin om ander afgode te dien. Die Here gaan vir Jerobeam 10 stamme gee. Ter wille van Dawid sal een stam en die stad Jerusalem onder Dawid se nageslag se beheer bly. Toe Salomo daarvan hoor, wou hy vir Jerobeam doodmaak. Jerobeam het na Egipte gevlug en daar bly woon tot Salomo dood was. Salomo se seun Rehabeam het in sy plek koning geword. Al die mense van Israel het in Sigem bymekaar gekom om hom koning te maak. Jerobeam se vriende het hom in Egipte gaan roep. Hy het die Israeliete gelei om met Rehabeam te gaan praat. Hulle het vir Rehabeam gesê: "Jou pa het die lewe vir ons baie moeilik gemaak en ons hard laat werk. As jy die las vir ons ligter maak, sal ons graag wil hê jy moet ons koning wees." Rehabeam het gesê hulle moet oor drie dae terugkom sodat hy eers kan dink oor hul versoek. Hy het die raadgewers wat vir sy pa gewerk het, gevra wat hulle daarvan dink. Hulle het gesê as hy na die mense luister, sal hulle hom altyd as koning aanvaar. Hy was nie tevrede nie en gaan vra toe sy jong vriende wat hulle dink. Hy het hul raad gevolg en drie dae later vir die volk gesê: "Julle vra dat ek my pa se las op julle ligter moet maak. Ek sal nie. Ek is baie sterker as my pa. Ek sal julle nog harder laat werk. Ek sal julle nog swaarder straf as julle nie hard genoeg werk nie." Toe die Israeliete sy antwoord hoor, was hulle woedend. Hulle het na hul huise toe terug gegaan. Rehabeam het toe net koning geword oor die mense wat in Juda gewoon het. Hy het een van die leiers wat by hom was, na Israel toe gestuur om te kyk wat hy kan reël. Die Israeliete het hom met klippe doodgegooi en Rehabeam self het dit net-net reggekry om weg te kom. Hy het vinnig na Jerusalem gevlug. Dit is hoe Israel weggebreek het van Dawid se familie af.

Begin die verhaal hier:

Die 12 stamme van Jakob is geskei deur 'n baie dwase besluit. Koning Rehabeam het twee dwase besluite geneem. Een was dat hy gekies het om na die raad van onervare jongmense te luister eerder as die raad van die ervare mense wat ook koning Salomo se raadgewers was. Die tweede fout wat hy gemaak het, was om te dink dat hy 'n belangriker en groter koning as sy pa sou wees. In die proses het hy sleg tweede gekom. Die mense het in opstand gekom en net twee van die stamme het by hom gebly. Die ander 10 stamme het Jerobeam as koning gevolg.

Die twaalf stamme was: Ruben, Simeon, Juda, Dan, Naftali, Gad, Aser, Issaskar, Sebulon, Benjamin en die nageslag van Josef se twee seuns, Manasse en Efraim. Levi se afstammeling het nie grond gekry nie, want hulle was aan die tempeldiens gewy. Net Juda en Benjamin het by Rehabeam gebly.

Die 10 stamme het bekend gestaan as die Noord-ryk of die Israeliete en die 2 stamme was die Suid-ryk of Juda. Hulle is later die Jode genoem. In Jesus se tyd was hierdie twee stamme steeds nie goeie vriende nie. Juda se heiligdom was Jerusalem en Israel se heiligdom was Samaria. In Jesus se tyd het die Jode en die Samaritane niks van mekaar gehou nie. Dis so hartseer dat 'n dwase besluit van een koning meer as 900 jaar later nog steeds vyandskap tussen mense veroorsaak het.

Die kinders kry tyd om oor die verhaal te dink:

1. Ek wonder of mense vandag nog partykeer so hardkoppig en dwaas is.
2. Ek wonder hoe kan mense wat vyande is, weer saamgebring word.
3. Ek wonder wie kan mense wat vyande geword het, weer saambring..



Werskaf

- Gee papier en kryte en laat die kinders iets teken wat losgemaak is. Laat hulle nou die papier middeldeur skeur of sny. Gee ook kleeflint om die twee stukke papier aan mekaar vas te plak.
- Gee verskillende stukkies wol of rekkies wat hulle kan vleg tot een tou.
- Fotostateer die kaart van die groter Israel op karton en knip dit op in stukke en laat hulle die “legkaart” weer bou.

Sluit af met die seënbede

Sit julle hande met palms teenmekaar:

“Here, soos my hande twee is, maar mekaar kan vashou, vra ek dat U asseblief sal help dat almal wat vir mekaar kwaad is, vrede sal maak en goed saam sal leef. Amen.”

